

Wers glaabd, werdd seelisch

Omm Sunndaach omm Stommdisch seet uff oomol de Schorsch: Bei dere Sach mett dem Fluuchzeuch doo unne iwverm Indische Ozean kimmt joo die Wahrheit nitt uff de Disch. Dess iss heit iwverall su, mir wern vunn dene doo owwe allemol dumm gehalle. Ja, moont de Karl, mir solle halt nitt alles wisse, mir deede uns nor uffreesche. Unn dess kann koo Regierung gebrauchte, dass mir uns uffreesche: mir solle meddem Kobb nicke unn unser Maul halle, die droo sinn deede schunn alles rischdisch mache. Isch frooch: Schorsch, was moonsden, wo mir nitt die Wahrheit gesaad krieg, weesche der Sach uff de Krim odder was?

Vill schlimmer, seet de Schorsch, vill schlimmer. Ess iss die Sach mett dere Luft. Was issen mett de Luft, frächt de Karl, die iss doch nimmi su dreggisch wie frieher, su im Gonse, mol abgeseh vunn de Luft iwver Flerschem dorsch die Fluuchzeuche. De Schorsch hott sich umgeguggd, obs aach kooner heern dut unn pischberd: Die Luft uff de Welt werdd alls wenischer unn doodemett de Sauerstoff. Die wisse dess, awwer saaches nitt, mir Kloone kennde sunnst enn Uffstonnd mache.

Die Luft werdd wenischer?, frächt de Karl, ei woher waaßden dess? Isch waaß dess, seet de Schorsch, unn weil in de Luft de Sauerstoff iss, den merr all brauche, werdds nitt long dauern unn mir wern all verstricke.

Isch saach: No ja, dess glaab isch emol nitt. De Schorsch hott sich widder umgeguggd. Isch habb dess nitt irschendwo gelese, isch habb dess sellwer entdeckt unn isch waaß, vunn was isch redde due. Weil die Mensche unn aach die Diern den Sauerstoff oiatme unn onnern Gase ausatme, werdd de Sauerstoff immer wenischer. Unn besonnens die Kieh, die dun e gons gefährlich Gas in die Luft entlosse, unn weil mir alls mieh Mensche wern unn alls mieh Fleisch esse, duts aach alls mieh Kieh uff de Welt gewwe. Die dun doo Gras fresse, wo bis doohie Wald odder Urwald gewese iss, unn weil die Beem doodeferr abgehaache worrn sinn, werdd vunn de Blädder alls wenischer Sauerstoff abgewwe.

Isch saach: Du moonst, weil die ville Kieh vill Ferrz losse, deet de Sauerstoff wenischer wern? Unsern Kummber Hubert deet saache: Eine sehr gewagte Theorie!

Ihr misst dess medde Luft joo nitt glaawe, seet de Schorsch, awwer isch habb dess bei mir festgestellt. Wenn isch droo denk, wie isch frieher die Trebbe enuff gerennd bin unn heit? Isch krieg kaum noch Luft, wenn isch e paar Stufe hochgieh unn dess kimmt vunn dem, dasses immer wenischer Luft unn Sauerstoff gewwe dut.

Du Ollwel, hott doo de Karl gesaad, frieher hosde aach dreisich Pund wenischer gewooche, du bist ze dick unn deshalb kriehsde koo Luft. Die Luft werdd wenischer unn aach de Sauerstoff – wers glaabd, werdd seelisch!

Doo flissderd de Schorsch: Die Luft unn de Sauerstoff zum Atme wern immer wenischer, die Trebb hotts merr gezeischd. Unn donn habb isch was entdeckt, doodruff iss noch kooner kumme. Ess dut doch 500 Millione Audos gewwe, habb isch gelese, unn? Unn was?, saach isch, die dun de Sauerstoff verbrauche, awwer nitt die Luft wenischer mache.

Jetzt hott de Schorsch su rischdisch bees gelacht. Doo sieht merr! Du, Honnes, willst immer su schlaui soi. Awwer jed Audo hott vier Reife unn isch habb entdeckt, die Luft, die uns fehle dut, stickt in dene die Milliarde vunn Audoreife droi.

De Karl hottem Schorsch uff die Schulter geklobbd unn hott ohne ze lache gesaad: Schorsch, ferr doi Entdeckung kriehsde bestimmt de Nobel-Preis! Eiern Honnes